

Ured koordinatora za reformu javne uprave (u daljem tekstu: Ured) Vrazova broj 9. 71 000 Sarajevo, kojeg zastupa koordinator za reformu javne uprave Doc.dr Dragan Ćuzulan (u daljem tekstu: Naručilac)

i s jedne strane

ZAMM Media CONSULTING d.o.o. kojeg zastupa Muamer Muftić (u daljem tekstu: Izvršilac ugovora)

s druge strane

zaključuju sljedeći:

UGOVOR O KONSULTANTSkim USLUGAMA

Član 1. (Predmet ugovora)

Predmet ovog Ugovora je nabavka konsultantskih usluga za realizaciju projekta "Pojednostavljenje i unapređenje zapošljavanja u državnu službu" a po prihvaćenoj Ponudi Izvršioca ugovora broj:01-06/17 od 12.01.2017. godine koja je sastavni dio ovog Ugovora.

Član 2. (Obim usluga)

(1) Konsultantske usluge obuhvataju sljedeće:

KOMPONENTA 1: Analiza postojećeg stanja u oblasti zapošljavanja u državnu službu i definisanje politika i smjernica zapošljavanja:

- a) Pregled i analiza postojećeg stanja u oblasti zapošljavanja u državnu službu;
- b) Integrisano planiranje potrebnih ljudskih resursa;
- c) Definisanje politika i okvira za formulisanje strategije zapošljavanja;
- d) Razvoj metodologije za procjenu i primjenu ključnih kompetencija u procesu zapošljavanja;
- e) Pojednostavljenje i unapređenje procedura regrutovanja;

KOMPONENTA 2: Unapređenje modela selekcije i izbora kandidata u državnu službu:

- a) Pregled i analiza instrumenata selekcije iz ugla različitih kategorija zahtjeva (kompetencija);
- b) Priprema finalnog prijedloga unaprijedene metodologije (okvira) za provođenje selekcije i izbora kandidata u javnu službu;
- c) Definisanje politika za uvodenje u posao novih zaposlenika u državnoj službi (program orijentacije i socijalizacije);

KOMPONENTA 3: Izgradnja kapaciteta menadžera i specijalista za ljudske potencijale u javnoj upravi u BiH za implementaciju unaprijeđenog modela zapošljavanja u državnu službu:

- a) Razvoj programa za uvođenje i primjenu unaprijeđenog modela zapošljavanja u državnu službu;
- b) Stvaranje pretpostavki za daljnji razvoj i unapređenje modela zapošljavanja (za održivost modela);
- c) Uvođenje sistema za redovno praćenje i izvještavanje o realizaciji poslova na procjeni efekata sistema zapošljavanja na nivou pojedinačnih institucija;
- d) I druge aktivnosti predviđene projektnim zadatkom.

Član 3. (Cijena)

- (1) Ukupna cijena usluga iz člana 2. ovog Ugovora iznosi 362.384,10KM (slovima:tristotinešezdesetdvijehiljadetricestotineosamdesetčetiri konvertibilnih maraka i deset konvertibilnih feninga) sa porezom na dodanu vrijednost (PDV).
- (2) Cijena usluga iz prethodnog stava ovog člana uključuje:
 - a) Troškove angažiranja eksperata u iznosu od 218.900,00 KM bez PDV-a (slovima:dvijestotineosamnaesthiljadadevetstotinakonvertibilnih maraka) u skladu sa honorarima eksperata utvrđenim u prihvaćenoj Ponudi Izvršioca ugovora.
 - b) Troškove usluga koji spadaju u kategoriju pratećih troškova u maksimalnom iznosu od 90.830 KM KM bez PDV-a (slovima:devedesethiljadaosamstotridesetkonvertibilnih maraka). Prateći troškovi za usluge su bliže opisani u tački 6.6. Projektnog zadatka koji predstavlja sastavni dio ovog Ugovora.
 - c) PDV za usluge iz tačke a) i tačke b) ovog stava u ukupnom iznosu od 52.654,10 KM i popust u iznosu od 0 KM (ukoliko se isti odobrava).
- (3) Plaćanje za usluge iz kategorije pratećih troškova, mora prethodno odobriti Naručilac po osnovu ispostavljenog pisanog zahtjeva Izvršioca ugovora, u svakom pojedinčanom slučaju gdje se traži trošenje ovih sredstva. Osnov za plaćanje usluga iz kategorije pratećih troškova predstavlja prihvaćena Ponuda i terminski plan projektnih aktivnosti koji će Izvršilac ugovora usaglasiti sa Naručiocem u periodu pripreme početnog izvještaja.

Član 4.
(Realizacija Ugovora)

Konsultantske usluge će biti realizirane u skladu sa Projektnim zadatkom, prihvaćenom Ponudom Izvršioca ugovora i elementima koji dodatno budu usaglašeni kroz početni izvještaj Izvršioca ugovora, a koji se podnosi na odobrenje Naručiocu na način i u vremenu koji su utvrđeni Projektnim zadatkom i u skladu sa Općim uslovima ovog Ugovora.

Član 5.
(Mjesto izvršenja Ugovora)

Izvršilac ugovora će uslugu pružati u Bosni i Hercegovini na lokacijama kako je utvrđeno Projektnim zadatkom, pod uslovima i na način reguliran u Projektnom zadatku, odnosno prihvaćenoj Ponudi Izvršioca ugovora.

Član 6.
(Obaveze Izvršioca ugovora)

(1) Izvršilac ugovora je obavezan osigurati sve organizacijsko-tehničke prepostavke za implementiranje projektnog zadatka u skladu sa zahtjevima Naručioca, i isti realizirati prema uslovima iz Projektnog zadatka i prihvачene ponude Izvršioca ugovora.

Član 7.
(Garancija za dobro izvršenje posla)

Izvršilac je obavezan dostaviti Naručiocu garanciju za dobro izvršenje posla u iznosu od (10% od vrijednosti ugovora sa uračunatim PDV-om) 36.238,41 KM (slovima: tridesetšest hiljadadvjestotinetridesetosamkonvertibilnih maraka i četrdesetjedan konvertibilnih fening) najkasnije 15 (petnaest) dana po potpisivanju Ugovora koja će glasiti na period od zaključenja ugovora do isteka ugovora + 30 dana (12 mjeseci + 30 dana).

- (1) Garanciju za dobro izvršenje posla potrebno je dostaviti u formi bezuslovne bankarske garancije.
- (2) Garancija za dobro izvršenje posla će služiti za pokrivanje svake štete i troškova koje Naručilac može imati ukoliko Izvršilac povredi Ugovor u periodu od zaključenja ugovora do isteka ugovora + 30 dana.
- (3) Pokriće iz garancije za dobro izvršenje posla ne oslobađa Izvršioca odgovornosti sve do namirenja stvarne štete.
- (4) Naručilac može u slučaju neispunjena ili lošeg ispunjenja ugovornih obaveza od strane Izvršioca realizovati garanciju za dobro izvršenje posla, nakon što Izvršilac pisano obavijesti o propustima u realizaciji ugovornih obaveza i ostavi mu razuman rok za otklanjanje propusta.
- (5) Ukoliko Izvršilac ne dostavi garanciju za dobro izvršenje posla u roku iz stava (1) ovog člana ovaj Ugovor će se smatrati apsolutno ništavim shodno članu 72. stav 4. Zakona o javnim nabavkama BiH.

Član 8.

(Sukob interesa)

Izvršilac ugovora nema pravo da zapošljava, u svrhu izvršenja ugovora o javnoj nabavci, fizička lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažovala komisija za nabavke, i to u periodu cjelokupne realizacije ugovora.

Član 9.

(Način i uslovi plaćanja)

- (1) Naručilac se obavezuje da će ugovoren i znos za izvršene usluge iz člana 2. ovog Ugovora Izvršiocu ugovora isplatiti na poslovni račun broj:1410010010240746 kod BOSNA BANK INTERNATIONAL d.d. Sarajevo.
- (2) Plaćanja će biti izvršena u skladu sa Općim uslovima ugovora i dinamikom izvještavanja predviđenom projektnim zadatkom.

Član 10.

(Porezi i carine)

- (1) Ukoliko Izvršilac ugovora nema sjedište u BiH, obavezan je imenovati poreskog zastupnika do momenta potpisivanja ovog Ugovora koji će u njegovo ime izvršiti obračun poreza na dodanu vrijednost (PDV) za predmetne usluge iz člana 2. ovog ugovora i preduzeti druge radnje u skladu sa članom 8. Pravilnika o registraciji i upisu u jedinstveni registar obveznika indirektnih poreza („Službeni glasnik BiH“ broj 51/12 i 68/16).
- (2) Izvršilac ugovora i imenovani poreski zastupnik iz stava (1) ovog člana obavezni su dostaviti Naručiocu svu dokumentaciju koja se nalazi u njihovom posjedu, a koja je potrebna kako bi Naručilac mogao izvršiti povrat poreza na dodanu vrijednost (PDV).
- (3) Izvršilac ugovora i imenovani poreski zastupnik iz stava (1) ovog člana dužni su pružiti punu podršku svim aktivnostima Naručioca u cilju povrata poreza na dodanu vrijednost (PDV).

Član 11.

(Izvještavanje)

- (1) Izvršilac ugovora će podnosi izvještaje u vremenu i na način kako je navedeno u Projektnom zadatku i Općim uslovima. Izvršilac ugovora je obavezan da dostavi finansijske izvještaje prema formatu koji će mu ugovorni organ dostaviti po potpisivanju ugovora, u skladu sa internim Procedurama upravljanja finansijama PAR Fonda.
- (2) Naručilac zadržava pravo da u periodu pripreme početnog izvještaja sa Izvršiocem ugovora dodatno utvrdi formu i detaljniju sadržinu pojedinih izvještaja koji se podnose u sklopu ugovora.

Član 12.
(Struktura Ugovora)

Ovaj Ugovor obuhvata sljedeće Priloge koji su njegov sastavni dio:

- Prilog I: Opći uslovi Ugovora za projekte finansirane iz Fonda za reformu javne uprave
- Prilog II: Projektni zadatak "Pojednostavljenje i unapređenje zapošljavanja u državnu službu"
- Prilog III: Ponuda broj 01-06/17 od 12.01.2017.godine.

Član 13.
(Rješavanje sporova)

Ugovorne strane će nastojati svoje eventualne sporove iz ovog Ugovora rješavati sporazumno, a ukoliko to nije moguće, svaka od ugovornih strana može zahtijevati rješavanje spora od strane nadležnog suda u skladu sa zakonima Bosne i Hercegovine.

Član 14.
(Primjena drugih pravnih propisa)

Za sve što nije regulirano ovim Ugovorom primjenjivat će se Zakon o obligacionim odnosima.

Član 15.
(Stupanje na snagu i period izvršenja ugovora)

- (1) Ovaj Ugovor stupa na snagu na dan kad ga obje ugovorne strane potpišu.
(2) Ugovor je sklopljen na period od 12 mjeseci.

Član 16.
(Završne odredbe)

Ovaj Ugovor je sastavljen u četiri jednaka primjerka, od kojih svaka ugovorna strana zadržava po dva primjerka.

U Sarajevu, dana 15.05.2017.godine
Broj: 04-07-2-80-4/17

